

Sospechoso di abusa di dos menor di edad lo mester duna cuenta den Corte

ORANJESTAD (AAN): E sospechoso F. lo mester duna cuenta na Hues pa dos delito serio cu e ta worde sospecha di dje. Otro siman Corte den Promer Instancia ta cuminsa cu tratamento di casonan penal.

Informacion cu DIARIO ta dispone di dje ta muestra cu Diabierna 11 Januari 2019 lo cuminsa cu tratamento di e caso penal cu Ministerio Publico a cuminsa contra e sospechoso F.

ABUSO SEXUAL:

E acusacionnan cu Fiscal lo presenta den Corte contra F. ta:

(*) Den e periodo di 16 di

Mei 2011 te 15 Mei 2013, el a abusa di un mucha cu ainda no tabatin 12 aña.

(*) Den e periodo di 26 di Mei 2010 te 25 April 2015, el a abusa di un mucha cu ainda no tabatin 16 aña.

E acusacionnan di Fiscal ta muestra cu durante 5 aña largo, e sospechoso F. tabata abusa di muchanan menor di edad.

Aña pasa DIARIO a publica hopi casonan di abuso di menor di edad, caminda claramente por mira cu Ministerio Publico y Corte di Husticia di Aruba ta impone castigo pisa pa esnan culpable.

Durante tratamento di e



caso, lo bay haya sa con e sospechoso F. tabata abusa di e dos muchanan. Tambe lo bay haya sa si e muchanan a keda afecta y si nan ta haya tratamento. Hopi biaha den casonan lam-

entable asina, e victima ta keda afecta y mester haya tratamento di psychiater.

Den casonan asina, Fiscal mester presenta cu pruebanan suficiente pa Hues por condena e sospechoso.

Luna pasa Hues di Corte di Husticia a declara un sospechoso di abuso di mucha liber. Esaki pasobra Hues ta haya cu no tabatin prueba di sosten. Ta solamente e declaracion di e mucha contra e declaracion di e sospechoso, kende ta para riba cu e no a haci nada. Hues a muestra cu e declaracion di e otro personanan, tur a bin for di e mesun fuente esta e victima. Esey no ta suficiente pa condena un persona y pesey Hues mester a declara e sospechoso liber.

Otro siman DIARIO lo informa lectornan kico tur a sosode den Corte.